

## 2 Timoti

### Naoa itəm tatol kəiu lan itəm Pol təməte tuwın kəm Timoti Nəghatən əkuəkır rəha naoa u 2 Timoti

**?Pah təməte naoa u?** Aposol Pol təməte naoa u.

**?Təməte tatuwın kəm pah?** Təməte tatuwın kəm Timoti. Kən in molkeike məmə ilat mın əpəh e niməfak rəha Efesas, məmə okotafin. Afin e “Nam-nusən Əkuəkır Rəha Naoa u 1 Timoti” o nıtunən məmə Timoti in pah.

**?Nəmegəhən tahro nulan nian təməte?** Nian kapman rəha Rom taskəlīm Pol əpəh Rom, in təsətatiğən e kalapus, məto in təmətatiğ e rəhan kit nimə, kən mopael mın kəmotatiğ ilat min motehm məmə in otəsagımən. Namnun japta rəha Wək Min tatəghat-in nian mın əh. Kən əmun kapman təmahl-iarəp in, kən taliwək əm mətan o nup kəiu. Məto roiu əh, tınuwın mın e kalapus əpəh Rom, kən kalapus əh in tərət ikin pahrien. Naoa rəha Wək Min təsəghat-inən nian əh, naoa tınol namnun rəkis. Kalapus əh in tətəp ikin, kən tiəkis o netəmim o nuwınən mətag-pən-in. Luk əm ilau min. Pol təmolkeike məmə Timoti otuwa mehm məto-inu in rəhan fren wır. Kən in molkeike məmə Timoti in otəmik naoa mın rəhan.

**?Təməte naoa u o naka?** Pol təmıtun məmə otəsuwəhən kohamnu in tımıs. Tol nəhlan, in təməte naoa u o nələhəu-pənən niməfak e nelmi netəm-iasol pısın mın neen tahmen e Timoti. Nian iəkis mın koatuwa o niməfak, kən Pol in tolkeike

məmə Timoti otətaskəlim Namnusən Təwir, kən matətul əskasik e nahatətəən rəhan, kən məsəginən nən-iarəpən Namnusən Təwir, kən in otətul matip o nətoən nahməən e nıpətın okəmə nəratən otuwa.

*Pol təmən təwir kəm Timoti*

<sup>1</sup> Io Pol, u io aposol kit rəha Kristo Iesu, itəm Uhgın təmıtəpun rəkis io məmə rəhan, kən mahl-ipa io məmə ekən-iarəp rəhan nənıəkısən rəha nəmegəhən lilin e Kristo Iesu. <sup>2</sup> İatən təwir kəm ik Timoti, nətik itəm iakolkeike pık ik. Pəs Uhgın Tata ne Kristo Iesu rəhatat İərəməə okuawte-in rəhalau nəwırən, ne nasəkitunən, ne nəməlinuən kəm ik.

*Pol təmıləs-ıpər nətəligən rəha Timoti*

<sup>3</sup> Nian rafın, lapın ne lenian, iatəfak ron ik, kən matən tagkiu kəm Uhgın ron ik. Kən iatol wək rəhan tahmen-pən əm e tipik mın, kən ekıtun məmə nolən rat kit təsətıgən lak. <sup>4</sup> Nıkkik tatuəh nahui nəmtəm, kən iakolkeike pık məmə ekəplan mın ik pəs nıkkik otagien. <sup>5</sup> Nıkkik tatuəh nahatətəən pahrien rəham itəm tahmen-pən əm e nahatətəən itəm təmaupən mətətıg e rəham pipi Lois ne rəham mama İunis, kən ekıtun məmə roiu in tınətətıg lam. <sup>6</sup> Kən tol nəhlan, iatən mın kəm ik məmə onakelel nıgəm rəha nəsanənən itəm Uhgın təmos-ıpınə o nolən rəhan wək. Uhgın təmos-ıpınə nəsanənən əh nian emələhəu-pən nelmək matəfak-pınə lam. <sup>7</sup> Ol wək e nəsanənən əh, məto-inu Uhgın təsos-ıpamən kəm kitat nıkin rəha nəginən, məto təmos-ıpa nıkin

**1:2:** Wək 16:1; 1 Tim 1:2

**1:3:** Wək 23:1

**1:5:** Wək 16:1

**1:6:** 1 Tim 4:14

rəha nəsanənən, ne nikin rəha nolkeikeən, ne nikin itəm tatol nolən mīn itəm in titun məmə kotətuatip.

<sup>8</sup> Kən inəh, əsaulis-inən o nən-iarəpən Iərəmərə, kən əsaulis-inən io itəm etatig e kalapus o nərgin. Məto e nəsanənən itəm Uhgīn tatos-ipinə kəm ik, nəkəike mol məmə io ne, itəm iatəto nahməən o namnusən təwir. <sup>9</sup> Uhgīn təmosmegəh kitat kən maun-in kitat məmə kitat okotuwa rəhan mīn netəmim itəm kotasim, kən təməsolən o nat kit itəm kitat kəmotol, məto in təmol e rəhan atip nətəligən, ne nəwīrən. Nian Uhgīn təməsolən əh nətueintən ne, məto in təmələhəu rəkis nalpəkəuən məmə in otawte-in rəhan nəwīrən kəm kitat e Kristo Iesu, <sup>10</sup> məto roiu, in təmol əp nəwīrən əh kəm kitat e nuwamən rəha Iosmegəh rəhatat, Kristo Iesu. Kən Kristo təmərəkīn nīmīsən ne rəhan nəsanənən, kən təmasiəgəpīn nəmegəhən u namnun tikə, kən kitat koatehm e namnusən təwir. <sup>11</sup> Kən Uhgīn təmītəpun io məmə io iəghat, ne aposol, ne iəgətun o namnusən təwir əh. <sup>12</sup> Tol nəhlən iatəto pīk nahməən ron u ikīn-u e kalapus. Məto əsaulis-inən, məto-inu ekītun məmə pah u iatahatətə lan, kən mītun wīr məmə in titun nehm wīrən nat naka itəm in təmələhəu-pa e nelmək o namnun nian.\*

<sup>13</sup> Ətəu-pən əm suatip rəha nəgətunən u tətəuatip itəm emən kəm ik, kən ol nat u e nahatətəən ne nolkeikeən e Kristo Iesu. <sup>14</sup> E nasitəən rəha Narmin Rəha Uhgīn itəm tətətig e nikitat, kən

**1:7:** Rom 8:15

**1:9:** Efes 2:8-9; Taet 3:5

**1:10:** Hip 2:14

**1:11:** 1 Tim 2:7

\*

**1:12:** Suatip pisin o nəuhlinən ves 12b: “kən mītun wīr məmə in titun nehm wīrən nat naka itəm io emələhəu-pən e nelmīn o namnun nian.”

atehm wir nat wir itəm Uhgın təmələhəu-pən e nelməm.

<sup>15</sup> Nəkitun məmə rəhak mın netəmim əpəh Esia, ilat Fukelas ne Hermokenes, ilat rafin kəmotagım rəkis motapəs io.

<sup>16</sup> Pəs İərəmərə otasəkitun Onesiforas ne rəhan mın, məto-inu nian tepət təmətasitu lak matiləs-ipər rəhak nətəligən. Kən təməsaulisən məmə emətətig e kalapus. <sup>17</sup> Nipahrienən, nian in təmuwa Röm, təmeam-in io, təmeam-in io mətoarus-pən məplan io. <sup>18</sup> !Pəs İərəmərə otasəkitun in e namnun nian! Ik nəkitun wir natımnat wir mın itəm təmöl kəm io əpəh Efesas.

## 2

### *Mopael təwir rəha Kristo İesu*

<sup>1</sup> Ik u nətik, pəs Uhgın otol nıkim təsanən e nəwırən itəm tətisi-pən e Kristo İesu. <sup>2</sup> Nəməto rəkis natımnat mın u itəm eməgətun itəmat lan e nıganəmti netəmim tepət. Kən os rəhak nəghatən mələhəu-pən e nelmi netəmim neen itəm natən nipahrienən elat, kən ilat okotıtun nəgətunən netəmim neen mın lan. <sup>3</sup> Nian nəratən tatuwa, məto ətul əskasik kitat mın ik, tahmen e mopael wir kit rəha Kristo İesu. <sup>4</sup> E nian rəha nəluaginən, mopael kit təsolən natımnat rəha nəmegəhən rəha netəmim əpnəpın əm, məto tatol əm wək rəha mopael məto-inu, in tolkeike məmə rəhan etəmiasol rəha mopael, nıkin otəgien lan. <sup>5</sup> E nolən kitiəh, etəm tətaiu məmə in otol win, in otəkəike mətəu-pən lou mın rəha naiuən, məto okəmə təsolən, kən in otəsosən nətouən rəha nol winən.

<sup>6</sup> Tətuatip əm min-nulan məmə etəm tatol pik wək e nasumən, in otaupən məulək-in. <sup>7</sup> Ətəlig-in wir nat naka iatən kəm ik, məto-inu İərəməyə otasitu lam o nitunən nıpəti nəghatən min u.

<sup>8</sup> Atətəlig-in İesu Kristo u noanol rəha Tefit, kən Uhgın təmosmegəh in e nımısən. Kən inu namnusən təwir iatən-iarəp. <sup>9</sup> Kən iatəto nahməən o namnusən təwir əh, kən nıpahrienən, kəməlis io e sen tahmen-pən məmə io iakləh kit o io-hamnu itəm. Məto kəsəlisən nəghatən rəha Uhgın. <sup>10</sup> Tol nəhlan, iatətul əskasik e nahməən min rafın o netəmim itəm Uhgın təmitəpun ilat, məmə in otosmegəh ilat e Kristo İesu, kən ilat okotatig e nəwıran itəm təhag-əhag rəha Uhgın, itəm namnun tikə.

<sup>11</sup> Inu nəghatən tatən pahrien məmə, Okəmə kotuwa kitiəh e Kristo e nımısən rəhan, kən okotəmegəh min kitat min.

<sup>12</sup> Okəmə koatətul əskasik e nian iəkis min, kən kitat okotərəməyə min kitat min. Okəmə kitat kotən-iamnin in, kən in otən-iamnin kitat.

<sup>13</sup> Okəmə kitat kəsotolən rəhatat noanawıl, məto in tatol rəhan noanawıl, məto-inu in otəkəike matol rəhan nolən.

### *Iolwək təwir rəha Uhgın*

<sup>14</sup> Natımmat min u, onəkəike matən matisimatıp lan kəm rəham min netəmim. Ən əskasik kəm ilat nəhlan məmə, “İatən e nərgın Uhgın məmə itəmat nəsotərgəhəuən o nıpəti nəghatən min.” Nərgəhəuən nəhlan təsasituən e suah kit, məto

---

**2:6:** 1 Kor 9:7    **2:8:** Rom 1:3; 1 Kor 15:4    **2:9:** Efes 3:1,13; Fil 1:12-14    **2:11:** 2 Kor 4:11    **2:12:** Mat 10:33    **2:13:** Rom 3:3-4; Taet 1:2

tatərəkɪn əm netəmim itəm koatəto. <sup>15</sup> Alkut əskasik məmə onəkuwa iolwək təwɪr itəm nian Uhgɪn tatəplan rəham wək, in titun nənən məmə, “Əwəh, nəmol təwɪr,” kən nəsaulisən o rəham wək, məto-inu natəgətun ətuatip nəghatən rəha nɪpahrienən. <sup>16</sup> Məto apəs nəghatən əpnəpɪn mɪn əm itəm kotərat məsotisiai-inən Uhgɪn, məto-inu netəmim itəm koatəghat nəhlan, nəmegəhən rəhalat tatuwɪn matuwɪn əm o nolən mɪn itəm kəsotisiai-inən Uhgɪn. <sup>17</sup> Nəgətunən rəhalat in tahmen-pən əm e nɪməgəm piən itəm tatəməhal matəpət matol iahgɪn. Təs mil u kioal min-nulan, ilau u Haemeneus ne Faelitas, <sup>18</sup> itəm kɪnuəmkarəpən rəkis e suatip rəha nɪpahrienən. Katuən məmə Uhgɪn təmol kitat kotəmegəh mɪn rəkis e nɪmɪsən, kən okol Uhgɪn təsos-ipa mɪnən nɪpətɪtat wi mɪn nian Iesu tatuwa mɪn. Kən təs mil u katuərəkɪn nahatətəən rəha netəmim neen. <sup>19</sup> Məto tol pap nəhlan, nɪmə itəm Uhgɪn tatiləkɪn tatətul tiəkis, kən təməte-pən lan məmə, “Iərəməərə titun netəm mɪn u rəhan mɪn,” ne “Netəm mɪn u koatən məmə ilat netəm rəha Iərəməərə, okotəkəike motapəs nolən rat mɪn.”

<sup>20</sup> Ətəlig-in-tu. E nɪmə rəha etəm rəhan nautə tepət, plet pɪsɪn pɪsɪn mɪn tepət. Kəmol neen e iaen u kol tatipit-ipit, neen e silfa, neen e nig, neen e nɪməptən. Wək rəha neen, in wək asol itəm katisiai-in. Kən wək rəha neen, in wək əpnəpɪn əm itəm tol naulisən. <sup>21</sup> Okəmə suah kit tatol rəhan nəmegəhən tatuwiwi mətapəs nolən rəha naulisən, in titun nolən wək asol itəm katisiai-in, kən Uhgɪn

**2:14:** 1 Tim 6:4; Taet 3:9**2:15:** 1 Tim 4:6**2:16:** 1 Tim 4:7**2:17:** 1 Tim 1:20**2:19:** Nam 16:5; Aes 52:11; Jon 10:14; 1 Kor

otələhəu kalin məmə rəhan pisin əm, kən mol əpen-əpenə məmə otol wək min itəm kotəwir.

<sup>22</sup> Aiu muwin isəu o nolən rat min itəm tatəwia e niki netəm aluə. Kən ətəu-pən wir suatip rəha natimnat min u: nolən itəm tətəuatip, ne nahatətəən, ne nolkeikeən, ne nəməlinuən. Ətəu-pən suatip əh itəmat netəm min u itəm koatətapəh o nasituən rəha İərəməərə e nikilat itəm təwir. <sup>23</sup> Apəs magim rəkis e nəghatən alməl min itəm nıpətılət tikə. Nəghatən min əh koatiuw-pa əm timəht o nərgəhəuən. <sup>24</sup> İolwək rəha İərəməərə, okol in təsərgəhəuən, məto in tətəkəike matol təwir kəm netəmim rafın, kən otəkəike muwa etəm rəha nəgətunən, kən rəhan nətəligən kaifəməh. <sup>25</sup> Okəmə netəmim neen koatən rat rəhan nəgətunən, kən in otəkəike məgətun wir ilat e nolən mətig əm. Kən okəm-naka Uhgın otegəhan-in məmə ilat okotəuhlin rəhalat nəmegəhən, məmə ilat okotitun nıpahrienən, <sup>26</sup> kən ilat okotuwa min e nətəligən təwir, kən motagim rəkis-in noanikulu rəha Setan, itəm təmaskəlīm ilat kən koatol nəwian.

### 3

#### *Nolən rat min iuəhkır o Namnun Nian*

<sup>1</sup> Məto onəkəike mitun nəghatən u məmə nian əskasik min okotuwa iuəhkır o Namnun Nian.

<sup>2</sup> Tol nəhlan məto-inu, netəmim okoatətəlig-in atip əm ilat, kən ilat okotolkeike pık məni. Netəmim okotəusit, moatos-ıpər atip əm ilat. İlat okotən rat netəmim ne Uhgın, kən ilat okotəht nəwia tata ne mama, kən okəsotənən məmə nikilat tətəgien o nat itəm katol kəm ilat, kən okəsotisiai-inən Uhgın.

<sup>3</sup> Rəhalat nolkeikeən kəm netəmim otikə, kən okəsotaluinən nəratən itəm suah kit otol kəm ilat. Ilat okotərəkin nərgi netəmim. Okəsotərəməəən e nolən mīn rəhalat. Nīkilat otagien əm o nərəkinən netəmim. Okotetəhau nat itəm in təwir. <sup>4</sup> Ilat kəut kəsua mīn, kən okotol natimnat rat neen məto kəsotətəlig-inən məmə nat naka otiet lan. Kən ilat okotiləs-ipər atip ilat, kən ilat okotolkeike pik natimnat o nətoən təwir e nīpətīlat, məto ilat okəsotolkeikeən Uhgīn. <sup>5</sup> Okotol nolən mīn rəha iəfak mīn məmə netəmim okotəplan, məto ilat okəsotolkeikeən məmə nəsanənən rəha Uhgīn otəuhlin rəhalat nəmegəhən mol kotuwīwi. Uwīn isəu o netəm mīn u.

<sup>6</sup> Apəs əm ilat məto-inu neen koatehm suatip o nuwīnən latuənu mīn, kən moatiuw rəkis nətəligən rəha nīpitan itəm rəhalat nətəligən təsəskasikən. Təfagə rat mīn rəha nīpitan mīn u, in tiəkis pik olat, kən nolən rat mīn tepət itəm ilat koatolkeike, koatiuw-pən ilat. <sup>7</sup> Kən nīpitan mīn əh koatətəlig-in wir e nəghatən mīn rafin rəha netəm mīn əh, məto ko kəsotitunən nəghatən rəha nīpahrienən. <sup>8</sup> Aupən ikin, Janes ne Jampres kəmatioal tīməht kəm Moses,\* kən e nolən kitīəh mīn əm, netəm mīn əh koatəht nəghatən rəha nīpahrienən. Netəm mīn u, rəhalat nətəligən tərīoah e nolən rat mīn, kən nolən rəha nahatətəən rəhalat in neiueiuə-əmən. <sup>9</sup> Məto nəgətun eiueiuəən rəhalat, ko təsətulən tuwəh, məto-inu netəmim rafin okotəplan məmə ilat kəsotitunən nat itəm koatəghat-in, kotahmen-pən əm e suah mil əh.

**3:5:** Mat 7:15,21; Taet 1:16  
nərik mil rəha kig rəha Ijip.

\* **3:8:** Janes ne Jampres, ilau iəmik  
**3:8:** Eks 7:11



*Nəghatən rəha Pol kəm Timoti*

<sup>10</sup> Məto ik, Timoti, ik nəmətəu-pən rəhak nəgətunən, ne nolən rəha nəmegəhən rəhak, ne nat naka itəm ekolkeike məmə ekol, ne rəhak nahatətəən, ne nolən rəha nətəligən rəhak itəm təfəməh, ne rəhak nolkeikeən, ne nətul əskasikən rəhak, <sup>11</sup> kən nəkitun nian iəkis mīn itəm koatuwa e rəhak nəmegəhən, ne nolən tərət mīn itəm katol lak. Kən nəkitun nolən iəkis mīn itəm kəmol lak əpəh Antiok, ne Ikoniam, ne Listra. Məto İərəməərə təmiləs-irəkis io e natimnat mīn əh rafin. <sup>12</sup> Nipahrienən, netəmim rafin itəm kotolkeike məmə okotol nolən itəm Uhgīn tolkeike, kən motol e Kristo İesu, netəmim okotol tərət kəm ilat, <sup>13</sup> məto nian kitəh mīn əm, nol təfagə rat mīn ne netəm rəha neıueıuəən, ilat okotol nolən rat motuwīn kol itəm in tərət aɡin. İlat netəmim kateıuə-in ilat, † kən ilat okoteıuə-in pīk aɡin-əh netəmim.

<sup>14</sup> Məto ik, Timoti, onakəkəike matətəu-pən əm natimnat wīr mīn itəm kəməgətun ik lan itəm nəməən əskasik rəkis nipahrienən lan, məto-inu ik nəkitun wīr netəmim itəm kəmotəgətun ik lan. <sup>15</sup> Kən nian nəmatəkəku mətoarus-pa u-roıu, nəmitun Naoa Rəha Uhgīn itəm titun nos-ıpənən nenatıgən məmə nəkitun nosən nəmegəhən lılin lan o nahatətəən e Kristo İesu. <sup>16</sup> Nəghatən mīn rafin e Naoa Rəha Uhgīn, kəmotısi-pən əm e nohlı Uhgīn, kən koatasıtu etat. Koatəgətun kitat, moatəniəp nolən rat mīn rəhatat, moatəg-ətuatıp-in kitat, kən moatəgətun kitat e nolən mīn itəm

---

**3:11:** Wək 13:50; 14:5; 14:19    **3:11:** Sam 34:19    **3:12:** Mat 16:24; Jon 15:20; Wək 14:22    † **3:13:** Setan o netəmim pisin mīn okoteıuə-in ilat.

kotətuatip. <sup>17</sup> Koatasitu etat nəhlan məmə, kitat netəm rəha Uhgın, okotos nasituən rafın mın əh, kən motuwa netəmim itəm kotitun nolən wək mın rafın itəm kotəwir.

## 4

<sup>1</sup> Timoti, oekən-ipinə nəghatən keike kit kəm ik e niganəmti Uhgın ne Kristo Iesu itəm otakil nolən rəha netəmim rafın, netəm koatəmegəh ne netəm kəmotimis, kən oekən-ipinə nəghatən u məto-inu in otuwa mın matərəməyə. Kən inəh, iakatəkəike matən kəm ik məmə, <sup>2</sup> ən-iarəp nəghatən rəha Uhgın, kən ətul matip o nən-iarəpən, nat əpnapın məmə otimətig əm, o tiəkis. Əg-ətuatip-in nolən rəha netəmim, kən ən-iəp nolən rat mın, kən mıləs-ipər nətəligən rəha netəmim, kən nian natol wək mın u, rəham nətəligən otəkəike məfəməh, kən rəham nəgətunən otəkəike mətuatip məwir. <sup>3</sup> Nəkəike mol nəhlan məto-inu, nian itəm tatuwa, netəmim okəsotolkeikeən məmə okotətəlig-in nəghatən pahrien. Məto ilat okotos iəgətun pisin pisin mın itəm okotəgətun nəghatən mın itəm ilat əm kotonkeike. <sup>4</sup> Kən ilat okotəuhlin matəlgilat o nətəlig-inən nəghatən pahrien, kən motuwın moatətəlig-in namsu eiueiuə mın.

<sup>5</sup> Məto ik, atehm wir rəham nətəligən ne rəham nolən mın e nian mın rafın, nat əpnapın nat pisin pisin mın koatuwa e rəham nəmegəhən, kən ətul əskasik nian nəratən tatuwa, kən uwın mən-iarəp namnusən təwir, kən ol rafın wək itəm Uhgın təmos-ipən kəm ik məmə onəköl.

<sup>6</sup> Timoti, ol natimnat min əh, məto-inu otəsuwəhən, io ekimis. Kən roiu nəmegəhən rəhak tahmen e wain itəm kinatəhtəg-pən e olta məmə okol sakrifais lan. <sup>7</sup> E rəhak fait wır rəha nahatətəən, ematipin wır nelmək, kən e rəhak naiuən, io emaiu wır rəkis mətoarus-pa namnun naiuən, kən io emataskəlīm wır nolən ətuatip rəha nahatətəən kən eməsapəsən wək rəha nən-iarəpən namnusən təwır. <sup>8</sup> Kən roiu, İərəmərə itəm rəhan nakilən tətuatip wır, in təmol əpen-əpenə e nətouən rəhak, inu hat rəha etəm tatol win e rəhan naiuən, kən in otəfauin-pa kəm io e nian rəha nakilən məto-inu in təmakil io məmə rəhak nəmegəhən tətuatip. Kən sənəmə io pisin əm, məto otos-ipən kəm netəmim rafin itəm kotalkeike moatəsahgin məmə in otuwa min.

*Pol təmən-iarəp namnusən rəha in min neen*

<sup>9</sup> Eam-in uəhai əm rəham suatip məmə onəkuwa mehm io, <sup>10</sup> məto-inu Temas, u tolkeike pik nətueintən u, in təmapəs io maiu muwin Tesalon-aeka. Kresens tinuwın rəkis əpəh Kalesia, kən Taetas tinuwın rəkis Talmesia. <sup>11</sup> Məto Luk pisin əm itımlau min. Təwır məmə nian nakatuwa, onakit Mak itımlau min, məto-inu in titun nasituən e wək rəhak. <sup>12</sup> Emahl-ipən rəkis Tikikas tuwin əpəh Efesas. <sup>13</sup> Kən nian nakatuwa, onakos rəhak kot itəm emələhəu kəm Kapas əpəh Troas, kən onakos min rəhak naoa min itəm kəmaiu-aiu, kən iakolkeike pik min məmə onakos naoa min u kəmol e nuwigi sipsip.

<sup>14</sup> Suah u Aleksanta itəm etəmim rəha nolən wək e iaen, in təmatol tərət kəm io. Iərəmərə otos-ipən nıtai nətouən rəhan o natimnat mın əh. <sup>15</sup> Kən ik mın, atəto ik o suah əh, məto-inu tətəhtosig-in nəghatən mın rəhatat.

<sup>16</sup> Nian emaupən mətul e kot məmə ekən-iarəp nəghatən mın rəhak, suah kit təməsətul-arəpən masitu lak, məto netəmim rafin kəmotagim motapəs io. Pəs Uhgın nıkin otəsəhtən natimnat rafin itəm ilat kəmoatol. <sup>17</sup> Məto Iərəmərə təmətul e nıkalik mos-ipa nəsanənən kəm io məmə ekən-iarəp wır nəghatən rəhan, kən pəs Iaihlua mın okotəto. Kən təmıləs-iarəp io e nohli laion. <sup>18</sup> Iərəmərə otıləs-irəkis io e nəratən mın rafin itəm okol kəm io, kən in otaskəlim wır io, kən mıləs io ekuwın e nərəmərəən rəhan əpəh ilis e nego e neai. Pəs kotıləs-ipər nərgın tatuwın matuwın namnun tıkə. Əwəh.

### *Namnun nəghatən*

<sup>19</sup> Iatən təwır kəm Prisila ne Akwila, ne Onesiforas ne rəhan mın. <sup>20</sup> Erastas təməsətəu-pa-mən io, in əpəh Korin. Kən nian emiet Maelitas, emapəs Trofimas tətətig məto-inu in tatimıs. <sup>21</sup> Alkut pık məmə nakuwa uəhai əm ikın-u, uarisig in nian rəha nətəpən. Iupulas tatən təwır kəm ik, kən Putens, ne Linus, ne Klotia, ne piətət mın rafin ikın-u koatən təwır kəm ik.

<sup>22</sup> Pəs Iərəmərə tətətig itəmat mın. Pəs Uhgın otawte-in rəhan nəwırən kəm ik.

**North Tanna New Testament**  
**The New Testament in the North Tanna Language of**  
**Vanuatu**  
**Le Nouveau Testament dans la langue du Nord Tanna**  
**de Vanuatu**

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 22 Feb 2024 from source files dated 31 Aug 2023

46e9a2b5-26b8-5301-a079-623f3a20ef8b